

Versaun Avansada laho Alterasaun

Distr.: Jerál
2 Outubru 2015

Orijinal: inglés

Komité ba Direitu Labarik nian

Observasaun ikus nian kona-ba relatóriu período daruak no datoluk hamutuk hosi Timor-Leste*

1. Komité konsidera relatóriu período daruak no datoluk hamutuk hosi Timor-Leste (CRC/C/TLS/3-4) iha enkontru 2041° no 2042° (haree CRC/C/SR.2041 no 2042), iha 25 Setembru 2015, no simu observasaun konkluzau sira tuir iha enkontru 2052° (haree CRC/C/SR.2052), iha 1 Outubru 2015.

I. Introdusaun

2. Komité haksolok ho relatóriu período daruak no datoluk ne'ebé Estadu hatama, no resposta sira ho hakerek ba problema ne'ebé identifika (CRC/C/TLS/Q/2-3/Add.1), mak ajuda komprende diak liu situasaun kona-ba direitu labarik nian iha Estadu ne'e. Komité apresia diálogo diak hamutuk delegasaun iha nivel aas no sektór oioin hosi Estadu ne'e.

II. Akompañamentu ba medida sira ne'ebé implementa tiha ona no progresu ne'ebé Estadu atinje

3. Komité haksolok ratifikasaun/adezaun ba:

(a) Konvensaun Nasoins Unidas Kontra Krime Organizadu Tranznasionál (2009);

(b) Protokolu ba Prevensaun, Hamenus, Punisaun Tráfiku ho Ema, Liuliu Feto no Labarik, liután Konvensaun Nasoins Unidas Kontra Krime Organizadu Tranznasionál (2009);

(c) Protokolu kontra Kontrabandu hosi Migrante sira liu hosi Rai, Tasi no Ár, liután Konvensaun Nasoins Unidas Kontra Krime Organizadu Tranznasionál (2009); no

(d) Konvensaun ILO nian (Nº. 182) hodi bandu no halo kedas asaun atu hapara servisu labarik nian (2009).

4. Komité haree ho satisfasaun medida lejizlativa hirak ne'ebé implementa, hanesan:

(a) Kódigu Servisu hosi 2012;

* Komité tuir iha sesaun dahitunuluk (14 Setembru -2 Outubru 2015).

- (b) Kódigu sivíl hosi 2011;
 - (c) Lei Kontra Violénsia Doméstika hosi 2010;
 - (d) Kódigu penál hosi 2009;
 - (e) Lei Protesaun ba Testemuña hosi 2009; no
 - (f) Lei Bázika ba Edukasaun hosi 2008.
5. Komité mós haksolok ho medida institusionál no polítika mak hanesan:
- (a) Planu Estratéjiku Dezenvolvimentu Nasionál (2011-2030);
 - (b) Planu Estratéjiku Edukasaun Nasionál (NESP) (2011-2015) no Asaun ba Edukasaun;
 - (c) Kuadru Nasionál ba Polítika Edukasaun Pre-eskola nian (2015);
 - (d) Harii Komisaun Nasionál ba Direitu Labarik nian iha 2009 (daudaun koñesidu nu'udar Komisaun ba Direitu Labarik nian); no
 - (e) Programa Eskola Amigavel ba Labarik (2009).

III. Área prinsipál sira ho preokupasaun no rekomendasaun sira

A. Medida jerál sira atu implementa (art. 4, 42 no 44 (6) hosi Konvensaun)

Rekomendasaun dahuluk nian hosi Komité

6. Maski Komité haksolok esforsu hosi Estadu-nasaun hodi implementa observasaun ikus Komité nian hosi 2008 (CRC/C/TLS/CO/1) iha relatóriu dahuluk estadu nian (CRC/C/TLS/1), komité verifika katak seidak tuir didi'ak rekomendasaun sira balun iha relatóriu ne'e, liuliu, saida mak iha relasaun ho fahe informasaun, konsiensializasaun no formasaun (para. 23).

7. **Komité fó-hatene ba Estadu atu hala'o medida sira ne'ebé presiza atu kumpre rekomendasaun sira-ne'e hotu hosi observasaun ikus iha relatóriu dahuluk nian (CRC/C/TLS/1) tuir Konvensaun ne'ebé seidak implementa kompletu.**

Lejizlasaun

8. Komité haksolok ho reforma legál ne'ebé la'o daudaun no kontribui hodi hadi'ak direitu ba labarik iha Estadu ne'e. Maski nune'e, Komité preokupa hela ho atrazu atu implementa lejizlasaun ba área sira tomak ne'ebé kona direitu labarik niak no ne'ebé importante loos atu implementa Konvensaun.

9. **Komité haforsa fali rekomendasaun sira dahuluk nian (CRC/C/TLS/CO/1, para. 9) katak Estadu tenke kontinua halo esforsu hodi dezenvolve kuadru lejizlativu didi'ak iha área sira tomak ne'ebé afeta direitu labarik nian tuir Konvensaun. Liuliu, Komité hato'o katak presiza aprova lalais Kódigu Labarik nian, Rejime Justisa Juvenil; Lei ba Prevensaun, Hamenus, Punisaun Tráfiku ho Ema, hanesan mós lei sira ne'ebé halo daudaun no iha relasaun ho protesasaun ba labarik no pena alternativa.**

Polítika no estratéjia ne'ebé globál

10. Komité verifika katak informasaun ne'ebé Estadu hato'o katak dezenvolvimentu kona-ba planu asaun nasional hodi implementa direitu ba labarik iha Estadu hetan daudaun diskusaun iha Konsellu Konsultivu.

11. **Komité rekomenda katak Estadu aprova lalais liu planu asaun ida ba labarik, tuir saida mak Komité rekomenda (CRC/C/TLS/CO/1, para. 11) atu garante dezvoltimentu hosi estratéjia ida atu implementa kompletu, mak inklui meta sira ho sira-nia prazu no objetivu ne'ebé bele sukat no tarjetu sira hodi halo monitorizasaun no avaliasaun ba progresu efetivu bainhira implementa direitu ba labarik liu hosi Estadu. Estratéjia nasional presiza mós iha ligasaun ho estratéjia no orsamentu nasional, sektor no munisípiu nian hodi garante distribuisaun apropiada ba rekursu umanu, tékniku no finanseiru ne'ebé presiza atu implementa.**

Koordenasaun

12. Komité verifika katak estabese ona Komisaun ba Direitu Labarik iha 2009 (KDJ), ne'ebé tama iha Ministériu Estadu nian, Koordenasaun hosi Asuntu Sosiál sira no Ministru Edukasaun nian. Maski nune'e, Komité preokupa katak KDJ laiha pesoál no rekursu sira natoon hodi hala'o ninia mandatu.

13. **Komité rekomenda katak Estadu tenke fó ba KDJ rekursu umanu, tékniku no finanseiru natoon hodi sira bele implementa no koordena polítika sira ba direitu labarik nian ne'ebé efetivu, globál, ho koerénsia no forte iha nivel oiain, no atu avalia impaktu hosi polítika no programa sira-ne'e ba direitu labarik nian.**

Distribuisaun ba rekursu sira

14. Komité haksolok ho aumentu maka'as hosi orsamentu ba saúde, edukasaun no servisu sosiál labarik sira-nian, no mós hosi asisténsia internasionál no ajuda ba dezvoltimentu ne'ebé iha relasaun ho Konvensaun. Maski nune'e, komité preokupa tanba laiha informasaun suficiente kona-ba hira hosi orsamentu mak fahe ba implementasaun direitu labarik nian tuir Konvensaun.

15. **Tuir saida mak halo diskusaun iha 2007 iha "Rekursu sira ba Direitu labarik sira-nian – Responsabilidade hosi Estadu", Komité fó-hanoin ba Estadu atu:**

(a) **Estabese prosesu orsamentu nian, ne'ebé inklui perspetiva ba direitu labarik nian no ne'ebé espesifika loloos oinsá mak fahe osan ba labarik sira iha sektor no ajénsia sira relevante, inklui indikadór espesífiku no sistema atu hetan informasaun;**

(b) **Definisaun kona-ba liña orsamentu estratéjika ba labarik sira ne'ebé iha dezvantajen ka iha situasaun vulneravel ne'ebé bele presiza medida sosiál loloos nian, no garante katak liña orsamentu sira-ne'e iha protesaun maski iha situasaun ekonómika ho krize, dezastre natural no emerjénsia sira, liuliu kona-ba saúde no edukasaun;**

(c) **Estabese mekanizmu sira atu halo monitorizasaun no avaliasaun ba distribuisaun efikás, suficiente no justu hosi rekursu sira iha implementasaun ba Konvensaun; no**

(d) **Hato'o informasaun ketak kona-ba kuantidade orsamentu ne'ebé fahe ba implementasaun direitu labarik sira-nian iha nivel nasional no lokal.**

Foti dados

16. Komité verifika katak hala'o foti dados no katak ministériu sira balun dezenvolve baze dados nian atu foti dados ho relasaun labarik nian no halo análise ba dados sira-ne'e. Komité mós verifika katak aplika tiha ona kestionáriu sira balun kona-ba problema labarik sira-nian. Maski nune'e, Komité preokupa katak seidak dezenvolve baze dados sentrál nasional kona-ba labarik sira no falta dados hirak iha prosesu foti dados jerál Estadu nian, liuliu kona-ba planeamentu, orsamentu, monitorizasaun no komunikasaun nasional.

17. Tuir komentáriu jerál N° 5 (2003) kona-ba medida sira jerál ba implementasaun, Komité rekomena ba Estadu atu hadi'ak lalais ninia sistema foti dadus. Informasaun sira-ne'e tenke kona-ba área hotu Konvensaun nian no tenke fahe tuir otas, seksu, defisiénsia, fatin jeográfiku, orijen étnika no nivel sosiál no ekonómika. Liután sira-ne'e, Komité rekomena katak informasaun no indikadór sira tenke fahe entre ministériu sira ne'ebé iha relasaun no tenke utiliza informasaun ne'e iha definisaun, monitorizasaun no avaliasaun ba polítika, programa no projetu sira atu implementa Konvensaun ho efetivu. Tuir kontestu ida-ne'e, Komité mós rekomena ba Estadu atu haforsa ninia kooperasaun téknika ho UNICEF, no seluseluk tan, no mekanizmu sira rejionál.

Monitorizasaun independente

18. Komité haksolok ho informasaun katak eskritóriu hosi provedór sai rekoñesidu ho kategoria instituisaun "A", no mós ho atividade sira oioin ne'ebé Eskritóriu hala'o tiha ona, mak inklui investigasaun, monitorizasaun, konsiensializasaun no programa edukasaun iha Dili no iha munisípiu sira kona-ba Konvensaun. Maski nune'e, Komité triste tanba la estabelese ekipa espesiál ba labarik sira ka pontu fokál ida ba direitu labarik sira-nian iha Eskritóriu provedór nian tanba laiha espesialista, menus kapasidade rekursu umanu sira no problema finanseiru. Komité mós preokupa ho informasaun ne'ebé simu katak Eskritóriu la iha asaun liu hodi defende direitu ba labarik sira no atu responde ba keixa hosi labarik sira ka hosi ema balun ne'ebé reprezenta labarik.

19. Tuir komentáriu jerál N°.2 (2002) kona-ba responsabilidade sira hosi instituisaun nasionál independente sira ba direitu umanu, Komité nia rekomendasaun ba Estadu mak:

(a) Estabelese seksaun ho pesoál no rekursu sira diak ba direitu labarik sira-nian iha Eskritóriu hosi provedór ne'ebé bele simu, investiga no responde ba keixa labarik sira-nian ho jeitu sensivel ba labarik, ne'ebé garante privasidade no protesaun ba labarik nu'udar vítima, no ne'ebé hala'o monitorizasaun, akompañamentu no verifikasaun ba atividade sira hanesan rekomendasaun dahuluk nian (CRC/C/TLS/CO/1, para. 15); no

(b) Hasai konxiénsia ba públiku jerál, no liuliu ba labarik sira, kona-ba sira-nia direitu hodi hato'o keixa ida, no garante katak prosesu ne'e fasil ba ema hotu, konfidensiál no amigavel ba labarik sira.

B. Definisauun kona-ba labarik (art. 1 hosi Konvensaun)

20. Enkuantu Komité verifika katak otas maioridade mak tinan 17, Komité preokupa katak labarik sira hotu ne'ebé menus tinan 18 la hetan protesaun kompleta tuir Konvensaun.

21. Komité rekomena ba Estadu atu foti medida sira atu garante katak lei doméstika sira hotu, tuir artigu 1 iha Konvensaun, bele fó protesaun kompleta ba labarik sira hotu ho menu tinan 18 tuir Konvensaun.

22. Komité preokupa ho otas mínimu atu kaben mak tinan 17 ba mane no fetu, no katak kaben ho labarik, liuliu ba fetu, sei maka'as loos iha Estadu ne'e. Komité preokupa liu ba fetu no mane ho tinan 16 ne'ebé bele kaben ho aprovasaun hosi sira-nia inan-aman.

23. Komité rekomena ba estadu atu:

(a) Garante katak hasa'e otas au kaben ba fetu no mane to'o tinan 18, no ba labarik ho tinan 16 sira labele duni kaben;

(b) Dezenvolve kampaña hasa'e konxiénsia no programa sensibilizasaun kona-ba efeitu negativu hosi kaben sedu liu ba saúde fízika no mentál no ba fetu nia moris, ho tarjetu mak uma-kain sira, autoridade lokál sira, juis sira, relijiozu sira no lider komunitáriu sira; no

(c) Tuir komentáriu jerál N° 18 kona-ba prátika sira aat (2014), implementa medida sira ho asaun hodi hapara prátika ne'ebé aat ba labarik sira iha estadu ne'e.

C. Prinsípiu Jerál sira (art. 2, 3, 6 no 12 iha Konvensaun)

Laiha diskriminasaun

24. Komité haksolok ho dispozisaun espesifika sira ne'ebé inklui protesau labarik kontra diskriminasaun iha Konstituisaun Estadu nian no lei seluseluk, ne'ebé inklui respeitu ba labarik defisiénsia no labarik ne'ebé moris ho ninia inan-aman la kaben malu. Maski nune'e, Komité preokupa ho grupu labarik sira balun, liuliu labarik sira hosi returned sira, labarik sira ne'ebé laiha sertifikadu batizmu, labarik ne'ebé moris ho sira-nia ina-aman la kaben malu, labarik ne'ebé mosu hosi relasaun seksuál entre membru uma-kain laran nian, Labarik sira ho defisiénsia, ne'ebé hasoru nafatin diskriminasaun, liuliu atu hetan asesu ba edukasaun no servisu seluk.

25. Komité rekomenda katak Estadu tenke garante ba labarik sira hotu iha estadu ne'e iha igualdade ba direitu sira tuir konvensaun no laho diskriminasaun, ne'ebé tuir lei no akontese duni, no halo esforsu maka'as liután hodi garante katak hakotu diskriminasaun hirak ne'ebé iha kontra grupu labarik sira mak refere iha leten no grupu labarik sira seluk ne'ebé daudaun iha situasaun marjinalizadu liu hosi kampaña hasa'e konxiénsia no edukasaun, no buat seluk tan, liuliu ba nivel comunidade no iha eskola sira.

Labarik sira-nia interese diak

26. Komité haksolok ho informasaun iha relatóriu mak interese diak labarik sira-nian mak prinsípiu ne'ebé integra sektór governu nian hotu no tama iha projetu Kódigu Labarik nian no projetu-lei ba Prevensaun, Hamenus no Punisaun Tráfiku ho Ema. Maski nune'e, Komité preokupa ho informasaun la suficiente kona-ba esforsu Estadu nian hodi garante direitu labarik sira-nian atu haree liu ba ninia interese molok implementa asaun ruma, no aplika direitu ida-ne'e iha lejlizasaun, hakat administrativu no judisiál, polítika no programa sira hotu ne'ebé iha relasaun ho labarik sira.

27. Tuir komentáriu jerál N° 14 (2013) kona-ba direitu labarik hodi haree liu ba ninia interese diak, Komité rekomenda ba Estadu atu haforsa ninia esforsu hodi garante integra ho diak direitu ida-ne'e no katak iha interpretasaun loos no aplika iha lejlizasaun, hakat judisiál no administrativu no desizaun sira hotu, no mós iha polítika, programa no projetu sira hotu ne'ebé relevante no iha impaktu ba labarik sira. Tuir ida-ne'e, Komité rekomenda Estadu atu dezenvolve prosesu no kritériu sira nu'udar matadalan ba autoridade sira hotu relevante hodi determina interese diak liu ba labarik iha área sira tomak no halo ida-ne'e nu'udar prioridade molok asaun ruma.

Respeitu ba labarik nia hanoin

28. Komité verifika esforsu hosi Estadu hodi garante respeitu ba labarik nia hanoin iha lejlizasaun balun no iha prosesu administrativu relevante no hakat judisiál ho relasaun ba labarik sira. Komité mós verifika atividade barak ho labarik nia partisipasaun no iniciativa sira hosi Konsellu Juventude Nasionál, Diresaun Nasionál ba Juventude no Parlamentu Juventude nian. Maski nune'e, komité preokupa ho prátika tradisionál no kulturál ne'ebé

bele la tuir no rekoñese labarik nia hanoin iha uma kain, eskola no comunidade sira, no katak respeito ba hanoin labarik nian la implementa ho prátika didi'ak iha área sira hotu relevante no iha nivel lokál no nasional, no inklui Labarik sira ho defisiénsia.

29. Tuir komentáriu jerál N° 12 (2009) kona-ba direitu labarik atu rona nia, Komité rekomena Estadu foti medida sira hodi haforsa direitu ida-ne'e tuir artigu 12 iha Konvensaun. Ba ida-ne'e, Komité rekomena ba Estadu atu:

(a) Hala'o medida sira hodi garante implementasaun efetiva ba lejislasaun ne'ebé rekoñese direitu labarik atu rona nia iha hakat sira legal relevante, ne'ebé inklui estabesele sistema sira no/ka hakat sira ba servisu-na'in sosiál no tribunal tuir prinsípiu ne'e; no

(b) Implementa programa no atividade atu hasa'e konxiénsia hodi promove partisipasaun diak no maka'as hosi labarik sira hotu iha uma kain, comunidade, eskola sira, no grupu konsellu estudante sira-nian, ho atensaun liu ba labarik sira iha situasaun vulneravel, ne'ebé inklui Labarik sira ho defisiénsia.

C. Direitu sivíl no Liberdade sira (art. 7, 8, no 13-17)

Rejistu loron moris nian

30. Komité haksolok ho informasaun iha relatóriu Estadu nian kona-ba esforsu atu hasa'e rejistu ba loron moris nian liu hosi harii tan eskritóriu ba rejistu loron moris nian, no loke rejistu "on-line", no rejistu moris nian ho telemovel no mós ho kampaña nasional kona-ba rejista labarik sira. Maski nune'e, Komité preokupa ho número labarik ne'ebé laiha rejistu ka halo rejistu tarde liu, no mós ho difikuldade atu halo rejistu, liuliu ba labarik iha área rural no tanba kustu ba dokumentu sira. Komité mós haforsa ninia preokupasaun tanba projetu ba Kódigu Rejistu Sivíl seidauk aprova (CRC/C/TLS/CO/1, para. 35).

31. Komité rekomena ba Estadu atu haforsa ninia esforsu hodi garante katak labarik sira hotu hetan sertifikadu moris nian gratis, ne'ebé mós rejista liu hosi telemovel no programa estensaun iha área rural liu Estadu nian, hasa'e konxiénsia kona-ba importánsia hosi rejista data moris nian no aprova no implementa projetu Kódigu Rejistu Sivíl nian.

D. Violénsia kontra labarik (art. 19, 24 (3), 28 (2), 34, 37 (a) no 39 iha Konvensaun)

Kastigu isin-lolon nian

32. Komité verifika katak Kódigu Labarik sira-nian la permite kastigu isin-lolon nian iha eskola sira no mós halo previzaun kona-ba obrigasaun atu hato'o informasaun husi abuzu ba labarik iha eskola laran no iha liur. Komité haksolok ho informasaun iha relatóriu Estadu nian kona-ba medida sira ne'ebé Ministériu Edukasaun implementa atu investiga keixa ba kastigu isin-lolon nian iha eskola. Maski nune'e, Komité preokupa katak kastigu ba isin-lolon hanesan buat ida hodi fô dixiplina ba labarik sira ne'ebé ema barak simu normál no sei akontese baibain iha eskola, no mós iha uma-kain nia laran no instituisaun ne'ebé labarik sira hela. Komité mós preokupa ho informasaun uitoan de'it kona-ba kastigu ba isin-lolon oioin.

33. Tuir komentáriu jerál N.º 8 (2006) kona-ba direitu labarik nian ba protesaun hosi kastigu isin-lolon nian, no komentáriu jerál N.º 13 (2011) kona-ba direitu labarik nian atu sai livre hosi violénsia, Komité rekomena ba Estadu atu:

(a) Aprova Kódigu Labarik nian no halo mudansa a lejislasaun atu la permite duni kastigu isin-lolon oioin, inklui iha uma-kain, eskola no instituisaun sira;

(b) Promove métodu pozitivu, laho violénsia no partisipativu ba edukasaun labarik nian no dixiplina nu'udar alternativa ba kastigu isin-lolon nian, no loke programa no formasaun kona-ba edukasaun inan-aman nian mós ba diretór, profesór sira, no profesionál seluk tan ne'ebé servisu ho no ba labarik sira; no

(c) Haforsa no haluan esforsu liu hosi kampaña hasa'e konxiénsia nian hodi fó informasaun ba públiku oioin kona-ba impaktu negativu hosi kastigu isin-lolon nian ba labarik sira no envolve labarik sira no mídia ho partisipasaun ativa iha prosesu ne'e.

Abuzu no neglijénsia

34. Komité verifika katak estadu hala'o inisiativa sira oioin hodi rezolve problema sira kona-ba labarik sira ho abuzu no neglijénsia, ne'ebé inklui aumenta ofisiál ba protesaun labarik iha munisípiu 13 hotu iha Estadu ne'e. Maski nune'e, Komité preokupa ho abuzu no neglijénsia ne'ebé kontinua nafatin iha Estadu ne'e. No Komité mós preokupa ho informasaun uitoan de'it kona-ba abuzu ba labarik no neglijénsia, hanesan mós informasaun menus liu kona-ba investigasaun sira, akompañamentu, rekuperasaun no integrasaun fali iha sosiedade.

35. **Komité rekomenda ba Estadu atu:**

(a) Haforsa nafatin programa hasa'e konsiénsia no ba edukasaun, ne'ebé inklui kampaña sira, mak envolve labarik sira, atu dezenvolve estratejia luan ne'ebé prevene no hasoru abuzu oioin ba labarik sira, mak inklui lejislasaun no polítika ne'ebé presiza, liliu Lei kontra Violénsia Doméstika no Política ba Protesaun Labarik, no mós aprova no implementa projetu Lei Protesaun ba Labarik;

(b) Estabelese mekanismu ho asesu diak ba labarik sira no ema seluk hodi hato'o kazu sira kona-ba abuzu no neglijénsia, ne'ebé garante protesaun diak ba vítima sira-ne'e;

(c) Fasilita rehabilitasaun fízika no psikológjika ba vítima labarik no garante sia bele asesu servisu saúde nian, inklui servisu saúde mental;

(d) Garante katak profesionál no pesoál servisu sira hotu ho no ba labarik sira hetan formasaun suficiente kona-ba oinsá prevene no halo monitorizasaun ba violénsia doméstika no simu, investiga no halo akuzasaun ba keixa ho violénsia ne'e iha labarik no ho sensibilidade ba jéneru.

(e) Garante distribuissau ba rekursu umanu, tékniku no finanseiru suficiente iha Rede Protesaun Labarik nian atu apoia rede ne'e atu implementa programa ho tempu naruk hodi hasoru kauza loloos ba violénsia no abuzu; no

(f) Motiva programa ho baze komunitária ho objetivu atu prevene no hasoru violénsia doméstika, abuzu ba labarik no neglijénsia, inklui envolve vítima, voluntáriu no membru comunidade sira, no fó formasaun no apoia sira.

Esplorasaun seksuál no abuzu

36. Komité haksolok ho kriminalizasaun ba delitu esplorasaun seksuál nian no abuzu ba labarik sira iha Kódigu Penál. Komité mós haksolok inisiativa sira balun Estadu nian atu hasa'e protesaun ba labarik, inklui assisténsia no apoiu ba vítima violénsia seksuál no abuzu. Maski nune'e, Komité preokupa barak ho aumentu ba abuzu seksuál ba labarik sira iha Estadu, inklui inestru. Komité mós preokupa ho informasaun uitoan de'it no dadus ho número kazu sira ne'ebé tama iha tribunal no rezultadu hosi prosesu sira-ne'e. Komité mós preokupa tan ho Planu Asaun Nasionál ba Violénsia tuir Jéneru ne'ebé laiha rekursu sira natoon atu implementa ho diak.

37. **Komité rekomenda maka'as Estadu atu:**

(a) Estabelese mekanizmu, prosesu no matadalan atu garante hato'ó informasaun, no investigasaun lalais no efetiva no akuzasaun ba kazu abuzu seksuál ba labarik, esplorasau, no inestu;

(b) Hala'ó programa hasa'e konxiénsia no ba edukasaun hodi hamenus stigma ba labarik vítima hosi esplorasau seksuál, abuzu no inestu, no garante kanál informasaun ba violasaun sira-ne'e ho fasil asesu, konfidensiál, amigavel ba labarik no efetivu;

(c) Garante katak ajénsia protesaun ba labarik iha pesoál no fundus suficiente, no katak profisionál sira hotu no pesoál ne'ebé servisu ho no ba labarik sira hetan verifikasaun ba sira nia istória pesoál no katak sira simu supervizaun no formasaun ne'ebé nesesária;

(d) Fó treinamentu beibeik ba polisia sira, servisu-na'in sosiál no promotór sira kona-ba oinsá simu, halo monitorizasaun, investigasaun no akuzasaun ba keixa ho sensibilidade ba labarik no tuir jéneru no ho respeitu ba vítima nia privasidade;

(e) Garante dezvoltamentu ba programa no polítika sira kona-ba prevensaun, recuperasaun no integrasaun fali iha sociedade ba vítima labarik, tuir rezultadu iha dokumentu ne'ebé aprova iha Kongresu sira Mundiál kontra Esplorasau Seksuál Komersiál ba Labarik, no

(f) Implementa ho diak Planu Asaun Nasionál ba Violénsia tuir Jéneru no garante katak iha finansiamentu suficiente.

D. Ambiente familiar no sistema kuidadu sira nu'udar alternativa (art. 5, 9-11, 18(1) no (2), 20, 21, 25 no 27 (4) iha Konvensau)

Ambiente familiár

38. Maski iha servisu no programa sira barak loos hodi apoia inan-aman no responsavel legál ba dezempeñu hosi sira-nia responsabilidade atu tau matan ba labarik sira, Komité preokupa ho uma-kain sira barak iha situasaun kiak, ho inseguransa ai han no apoia ne'ebé la tuir nesesidade, halo fali labarik tama iha instituisaun sira ba kuidadu labarik. Komité mós preokupa ho apoia finanseiru ne'ebé la suficiente maski iha iniciativa balun atu hamenus kiak, no asesu ba edukasaun infantíl no kuidadu ba labarik ki'ik mós la suficiente.

39. **Komité rekomenda Estadu atu:**

(a) Remata no implementa Polítika Sistema Apoiu Estadu nian ba Labarik no Família ho ninia objetivu mak haforsa uma-kain no comunidade sira hodi proteje no tau matan ba sira-nia labarik sira;

(b) Aumenta esforsu atu fó asisténsia suficiente ba inan-aman sira no responsavel legál iha sira-nia dezempeñu ba responsabilidade sira atu tau matan ba labarik, liuliu iha situasaun kiak no iha área rural sira, no mós tenke haforsa sistema ho benefísiu sira ba família no abonu-labarik nian, no servisu seluk, hanesan asesu ba edukasaun no kuidadu iha infánsia; no

(c) Aumenta programa hodi fó konsellu familiár no edukasaun ba inan-aman.

Labarik sira ne'ebé laiha ambiente familiár

40. Komité preokupa ho:

(a) Akordu informál ba kuidadu labarik, iha ne'ebé labarik sira ba hela ho uma-kain ne'ebé la'ós sira-nia família biolójika tanba razaun sira oioin, aumenta ba labarik sira-ne'e risku ba abuzu no esplorasau;

(b) Maski hakiak labarik sira hosi inan-aman seluk iha uma-kain nian mak prátika tradisionál iha Timor-Leste tomak no baibain nu'udar prátika pozitiva, monitorizasaun ne'ebé uitoan de'it hosi servisu protesaun nian aumenta risku ba abuzu iha labarik sira; no

(c) Governu laiha meu ne'ebé diak hodi supervizona distribuisaun ba labarik sira, no atu halo monitorizasaun ba qualidade servisu iha instituisaun ba kuidadu sira.

41. **Atu Estadu haree didi'ak matadalan kona-ba Kuidadu Alternativu ba Labarik sira (Asembleia Jerál ho rezolusaun 64/142, aneksu), Komité hato'o maka'as katak kiak finanseira no materiál – ka ho kondisaun hirak mak mosu direta no tanba situasaun kiak ne'e de'it – la'ós razaun ne'ebé suficiente atu hasai labarik ida hosi ninia inan-aman, atu hatama labarik ida iha instituisaun kuidadu alternativa ka atu prevene integrasaun sosiál hosi labarik ida. Tuir ida-ne'e, Komité rekomenda ba Estadu atu:**

(a) **Aumenta apoiu ne'ebé fó ba uma-kain biolójika atu prevene hatama labarik iha fatin seluk dook hosi família, maski liu hosi akordu informál;**

(b) **Aumenta esforsu atu labarik sira ne'ebé presiza kuidadu alternativu bele ba hela iha uma-kain seluk no la'ós iha instituisaun ruma, no katak sira kontinua hasoru sira-nia uma-kain rasik no bainhira diak liu ba labarik sira-nia interese fila fali ba sira-nia uma-kain rasik;**

(c) **Garante protesaun diak no kritériu klaru, tuir nesiedade no interese diak liu ba labarik, atu hatene se labarik presiza ba hela iha instituisaun ruma, no halo revizaun periódika ba fatin hela ba labarik sira iha instituisaun sira;**

(d) **Haforsa supervizaun hosi governu ba oinsá mak instituisaun kuidadu ba labarik funsiona, no halo revizaun ba Polítika, Prosesu no Modelu ba Sentru Kuidadu ba Labarik sira no Rezidénsia sira (2010) atu garante katak instituisaun ba labarik hotu la'o tuir polítika sira-ne'e, ne'ebé inklui mekanizmu aplikasaun ba lei; no**

(e) **Garante katak iha rekursu umanu, tékniku no finanseiru suficiente ba sentru kuidadu alternativu no ba servisu protesaun labarik relevante, atu fasilita reabilitasaun no integrasaun fali iha sociedade ba labarik sira barakliu ne'ebé hela iha fatin sira-ne'e.**

Adosaun (hakiak labarik nu'udar oan rasik)

42. Komité preokupa ho prátika sira iha Estadu ne'e ho relasaun ho adosaun informál iha ne'ebé uma-kain sira fó sira-nia labarik sira ba uma-kain seluk, dala barak tanba situasaun kiak no dívida boot. Komité mós preokupa ho Estadu, ne'ebé halo ratifikasaun iha Konvensaun Hague 1993 nian ba Protesaun ba Labarik no Kooperasaun ba Asuntu Adosaun Internasionál, maibé seidauk implementa Konvensaun ne'e ho prátika.

43. **Komité rekomenda ba Estadu atu regula ho urjente problema kona-ba adosaun informál iha Estadu ne'e. Komité mós rekomenda ba estadu atu aprova lejlzasaun no polítika sira kona-ba adosaun tuir Konvensaun. Komité rekomenda tan ba estadu atu aprova lei no polítika sira hodi implementa Konvensaun Hague 1993 nian kona-ba Protesaun ba Labarik no Kooperasaun ba Asuntu Adosaun Internasionál no hato'o informasaun kona-ba medida sira ba asuntu ida-ne'e, ne'ebé inklui mekanizmu atu kumpre ne'e, iha ninia relatóriu ba períodu tuir mai.**

E. Defisiénsia, saúde bázika no apoiu estadu nian (art. 6, 18 (3), 23, 24, 26, 27 (1–3) no 33 iha Konvensaun)

Labarik sira ho defisiénsia

44. Komité haksolok tanba hatama defisiénsia sira iha Planu Dezenvolvimentu Estratéjiku ba promosaun saúde nian. Komité mós haksolok ho sentru formasaun tolu ne'ebé harii nu'udar projetu pilotu iha Dili, Lautem no Aileu, ba formasaun profesór sira atu apoia Labarik sira ho defisiénsia iha edukasaun tomak. Maski nune'e, Komité preokupa ho:

(a) Seidauk implementa reforma ba polítika no lejizlativa ne'ebé sei presiza, no mós koordinasaun iha nivel nasional, atu garante direitu sira no partisipasaun ativa ba Labarik sira ho defisiénsia iha fatin sosiedade oioin;

(b) Labarik sira ho defisiénsia hetan diskriminasaun oioin, negliénsia no abuzu, laiha asesu ba edukasaun no kuidadu saúde nian no sira la partisipa ho diak iha área sira tomak iha moris sosiedade nian;

(c) Falta konxiénsia públika ba direitu labarik sira-nian ne'ebé defisiénsia;

(d) Fatin suficiente no diak ba Labarik sira ho defisiénsia iha eskola sira, ba desportu sira no atu halimar no fatin hela mós laiha, liuliu iha área rural sira;

(e) Falta dados estatística nian kona-ba Labarik sira ho defisiénsia iha Estadu; no

(f) Estadu seidauk ratifika Konvensaun hosi Direitu ba Ema Defisiénsia.

45. **Tuir komentáriu jerál N.º 9 (2006) kona-ba direitu labarik sira-nian defisiénsia, Komité hato'o ba Estadu atu tuir hanoin ba direitu umanu ba defisiénsia sira, harii estratéjia luan atu inklui Labarik sira ho defisiénsia:**

(a) Kontinua haforsa kuadru lejizlativu no polítiku, no mós esforsu atu koordena lei no polítika sira, ba promosaun no protesasaun hosi labarik sira-nia direitu iha nivel nasional, inklui halo revizaun no aprova planu Asaun Nasionál ba Ema Defisiénsia no Polítika Nasionál ba Edukasaun Inkluziva no Planu Asaun, no garante katak bainhira implementa ida-ne'e Labarik sira ho defisiénsia hetan duni benefisiu;

(b) Haforsa apoiu ba ema ne'ebé fó kuidadu ba Labarik sira ho defisiénsia ne'ebé inklui fó-hanoin no formasaun, no mós hasa'e osan ba Bolsa Da Mãe, no konsidera fó apoiu osan nian ba ema ne'ebé tau matan atu ajuda Labarik sira ho defisiénsia;

(c) Garante fó formasaun nafatin ba profisionál sira ne'ebé servisu ho Labarik sira ho defisiénsia, hanesan profesór sira, servisu-na'in sosiál no saúde nian, kuidadu médiku, terapeuta no pesoál, no dezenvolve matadalan sira no materiál treinamentu, no katak mekanizmu monitorizasaun ba dezempeñu hosi ema sira-ne'e la'o duni;

(d) Garante katak iha asesu diak ba eskola no kuidadu saúde nian, ne'ebé iha pesoál no fundus suficiente, no katak Labarik sira ho defisiénsia iha dignidade no respeito no mós benefisia hosi protesasaun efetiva;

(e) Hala'o kampaña atu hasa'e konxiénsia ba públiku sustentável atu públiku no *stakeholders* seluk bele toman ho direitu ba Labarik sira ho defisiénsia;

(f) Implementa medida sira hotu ne'ebé presiza atu garante katak Labarik sira ho defisiénsia bele tama diak iha área moris sosiál hotu, hanesan iha eskola, atividade desportu no halimar nian, no katak Labarik sira ho defisiénsia iha asesu diak ba fatin no área públika sira seluk;

(g) **Haforsa halibur dadus ne'ebé iha ketaketak kona-ba defisiénsia sira atu halo avaliasaun ba situaun jerál hosi labarik sira defisiénsia no informa sektór importante sira kona-ba polítika no programa sira importante atu hasoru situaun Labarik sira ho defisiénsia; no**

(h) **Konsidera ratifika Konvensaun Direitu ba Ema Defisiénsia.**

Saúde no servisu sira ba saúde

46. Komité haksolok ho Estadu ba ninia kompromisu atu fó asesu saúde primária gratuitu ba ema nasional hotu iha estadu ne'e, no verifika planu sira atu implementa Planu Estratéjiku Sektór Saúde nian, hanesan mós estratéjia sira oioin ho relasaun ba imunizasaun, nutrisaun, no saúde a labarik no foin-sa'e. Komité mós haksolok ho sub-índise lima ba mortalidade ne'ebé tun no esforsu sira atu hamenus númeru labarik sira klasifikadu nu'udar isin ki'ik (rakítiku), krekas liu no ho todan la suficiente, hasa'e nutrisaun diak ba labarik sira hotu, vasinasaun ba labarik sira hotu ne'ebé inklui hasai tétanu inan nian no bainhira oan foin moris, varíola no poliomielite, no seluseluk tan. Maski nune'e, Komité preokupa ho:

(a) Profisionál saúde nian ho kompeténsia diak sei menus liu, norma saúde nian sei fraku no servisu ba saúde formál la suficiente iha Estadu tomak, liuliu iha área rural sira, no fatór sira-ne'e kontribui nafatin atu iha nivel mortalidade ba oan-ki'ik no menus tina 5 ne'ebé aas, nivel mortalidade inan nian aas loos, Labarik sira ho defisiénsia, no moras barak loos;

(b) Malnutrisaun no falta ba mikro-nutriente sei barak loos, no nivel ho isin krekas liu, númeru maka'as kona-ba labarik sira ne'ebé la hetan imunizasaun kompleta, asesu la suficiente ba sasán "WASH" (be'e, saneamentu no ijiene nian) (be'e moos atu hemu, sanitasaun bázika no ijiene), ne'ebé inklui eskola no fatin saúde nian, liuliu iha área sira rural;

(c) Nivel aas hosi poluisaun ár iha laran tanba prátika te'in tradisionál; no

(d) Nivel ki'ik ba aleitamentu maternu eskuzivu iha fulan 6 hafoin moris;

47. **Komité, tuir komentáriu jerál N.º 15 (2013) kona-ba direitu labarik atu iha Kuidadu saúde ne'ebé diak liu (art. 24), rekomenda ba Estadu atu:**

(a) **Kontinua haforsa esforsu atu garante rekursu finanseiru no umanu, liliu ba kuidadu molok moris, hafoin moris no bainhira moris ona, liliu iha área sira rural;**

(b) **Hasa'e formasaun no asesu ba profisionál saúde nian no parteira sira iha tempu partu nian, no imlementa inisiativa atu prepara comunidade ba hahoris oan nian atu aumenta númeru partu sira iha fatin saúde nian;**

(c) **Kontinua halo atividade sira atu prevene labarik sira ho isin ki'ik (rakítiku), krekas liu no ho todan la suficiente, ne'ebé inklui prátika diak kona-ba fó hahán ba oan ki'ik, no kontinua hasa'e konxiénsia ba problema nutrisaun nian, no mós promove edukasaun ba nutrisaun oioin, inklui liu hosi Estratéjia Nutrisaun Nasional;**

(d) **Aumenta kuantidade profisionál saúde nian atu garante katak labarik sira hotu iha asesu ba servisu saúde ho qualidade, inklui imunizasaun iha munisípiu sira hotu, no implementa sistema rejistu eletróniku labarik nian atu garante katak labarik sira hotu rejistradu ba imunizasaun;**

(e) **Haforsa esforsu sira no aumenta rekursu sira atu garante katak uma, eskola no fatin públuku seluseluk iha sasán "WASH" (bee, saneamentu no ijiene nian) ne'ebé natoon, liuliu iha área sira rural, no hasa'e konxiénsia kona-ba teen arbiru,**

saneamentu diak no prátika fase liman, inklui implementa polítika atu promove Tee Liur Gratuítu iha komunidade sira rurál.

(f) Hadi'ak asesu ba fatin ho bee moos liu hosi haforsa koordenasaun iha governu, dezenvolve planu asaun no garante pesoál no orsamentu suficiente ba Departamentu Abastesimentu Bee iha Obra Públika, liuliu ba komunidade rurál sira;

(g) Haforsa medida sira atu hatama teknolojia te'in moos no hasa'e konxiénsia kona-ba ligasaun entre moras dada iis nian no utilizaun hosi ai-maran ba te'in tradisionál, no mós hamenus dependénsia ba ai-maran, liu hosi subsidiu ba kustu mina te'in nian; no

(h) Aprova no implementa Polítika Aleitamentu Maternu Timor-Leste nian no Kódigu Komersializasaun Substitutu Susubeen Maternu, Suplementu Susubeen Maternu no Produitu ho Relasaun ida-ne'e, aumenta númeru sentru saúde ne'ebé apoia prátika sira-ne'e, no aumenta lisensa maternidade hosi fulan tolu ba fulan neen atu suporta hahán infantil ne'ebé diak.

Saúde Mentál

48. Komité preokupa ho asesu limitadu ba kuidadu saúde mentál no rehabilitasaun psikososial ba labarik sira, liuliu ba sira ne'ebé hetan violénsia, inklui violénsia seksuál no asédu, no abuzu no negligénsia.

49. **Komité ho referénsia ba komentáriu jerál N.º 15 (2013) kona-ba direitu labarik atu iha kuidadu saúde ne'ebé diak liu, rekomenda ba Estadu atu haforsa kualidade servisu ne'ebé iha no programa ba saúde mentál ba labarik sira no, liuliu:**

(a) Implementa medida sira atu aumenta númeru hosi especialista sira ba saúde mentál labarik sira-nian no garante fatin diak no mós servisu ambulatoriu ba rehabilitasaun psikososial; no

(b) Garante treinamentu ba profesionál sira hotu ne'ebé servisu ho labarik sira atu identifika no rezolve problema saúde mentál, liuliu uma ba labarik sira, fatin seguru no sentru korresaun ba juventude.

Saúde ba foin-sa'e

50. Komité haksolok ho informasaun kona-ba programa no servisu sira atu prevene no halo tratamentu ba saúde foin-sa'e nian, ne'ebé inklui saúde reprodutiva. Maski nune'e, Komité preokupa ho:

(a) Taxa isin-rua maka'as iha foin-sa'e sira ne'ebé iha relasaun ho kaben ho labarik iha Estadu ne'e, koñesimentu limitadu ba saúde reprodutiva, no barreira sosiál no kulturál ne'ebé taka dalan ba juventude no foin-sa'e sira atu buka informasaun no servisu ba saúde reprodutiva;

(b) Dezafiu boot hosi Estadu atu garante katak foin-sa'e sira hotu bele hetan asesu efektivu ba servisu saúde hosi reproduasaun seksuál, inklui prevensaun ba HIV no moras ho tranzmisaun seksuál;

(c) Nivel maka'as hosi konsumu ba tabaku no alkol entre foin-sa'e sira; no

(d) Estadu seidak hala'o estudu ida kle'an atu avalia natureza no alkanse hosi problema sira ba saúde foin-sa'e, inklui konsumu substánsia/droga sira no prevensaun ba HIV/AIDs.

51. **Tuir komentáriu jerál N.º 4 (2003) kona-ba saúde foin-sa'e, Komité rekomenda ba Estadu atu:**

(a) Dezenvolve kampaña hasa'e konxiénsia no programa sensibilizasaun kona-ba efeitu aat hosi isin-rua sedu liu ba saúde fízika no mentál no moris diak ba feto no ninia oan, ba uma-kain sira, autoridade lokál, lider relijiozu no juis sira;

(b) Promove edukasaun seksuál tuir ema nia otas ba foin-sa'e sira no mós comunidade tomak, liuliu atu halo prevensaun ba isin-rua iha foin-sa'e sira no Moras Tranzmisaun Seksuál, inklui HIV/AIDS;

(c) Aprova lei sira atu estabeselese otas mínimu ba konsumu alkól no utilizasaun tabaku, no estabeselese programa apoiu no servisu sira atu rezolve abuzu ba substánsia/droga no mós ho programa intervensaun sira no kampaña sira atu hasa'e konxiénsia; no

(d) Halo estudu kle'an atu avalia natureza no estensaun kona-ba problema saúde iha foin-sa'e sira, ho partisipasaun maka'as hosi foin-sa'e sira, nu'udar baze ba polítika no programa sira saúde nian iha futuru.

Padraun moris nian

52. Maski Estadu fó asisténsia finanseira ba uma-kain sira, Komité preokupa barak ho índise labarik sira boot ne'ebé moris iha kraik liña kiak nian, no sira la hetan direitu sira barak hosi Konvensaun, inklui direitu ba saúde, edukasaun no protesaun sosiál.

53. **Komité rekomenda maka'as a estadu atu:**

(a) Aumenta ninia esforsu atu rezolve, iha tempu badak no ho tempu naruk no sustentável, nível boot kona-ba labarik sira ki'ik, inklui dezeńu ba polítika pública sira no planu nasional ida atu kombat kiak infantíl;

(b) Haforsa programa protesaun sosiál sira tomak atu hadiak rezultadu ba labarik sira, no mós estratejia hamenus kiak atu identifika asaun prioritária kontra eskluzaun labarik sira-nian, ho objetivu spesifiku no ne'ebé ita bele sukat, indikadór klaru, prazu no apoiu ekonómiku no finanseiru suficiente; no

(c) Halo parseria ho UNICEF no organizasaun seluk atu harii protesaun patamár definidu iha nasional atu iha asesu ba servisu báziku ba labarik sira, nu'udar inisiativa Patamár ba Protesaun Sosiál hosi Nasoins Unidas.

F. Edukasaun, atividade sira atu halimar no kulturál (art. 28, 29, 30 no 31 iha Konvensaun)

Edukasaun, ne'ebé inklui formasaun no orientasaun profisionál

54. Komité haksolok ho progresu diak iha nivel edukasaun oioin, ho investimentu diak ba konstrusaun no rehabilitasaun fatin eskola sira, no ho aumentu boot kona-ba distribuisaun osan ba edukasaun, inklui edukasaun vokasionál. Maski nune'e, Komité preokupa ho:

(a) Númeru ki'ik hosi labarik sira ne'ebé tama iha pre-eskola, taxa inskrisaun ki'ik iha eskola sekundária, liuliu iha área sira rural, númeru labarik sira ne'ebé la tuir eskola, repetisaun fali liuliu iha nivel pre-sekundáriu, no taxa dezisténsia nian, liuliu entre mane sira;

(b) Númeru eskola pública la suficiente, fatin sira la suficiente, kustu indiretu iha edukasaun, pesoál ne'ebé hanorin ho formasaun profisionál la suficiente, formasaun ba profesór no materiál sira la suficiente, no nivel alfabetizasaun ki'ik iha lian Tetun no Portugés;

(c) Asesu insuficiente ba edukasaun hosi Labarik sira ho defisiénsia, foin-sa'e nu'udar inan, labarik sira ne'ebé servisu no oan-kiak, labarik ne'ebé moris ho kiak, no grupu linguístiku ki'ik; no

(d) Asédiu seksuál no violénsia iha eskola, isin-rua sedu liu ba foin-sa'e feto sira no stigma no eskluzaun ba feto sira-ne'e ne'ebé ba fali eskola.

55. Tuir komentáriu jerál N.º 1 (2001) kona-ba edukasaun, Komité rekomena Estadu atu:

(a) **Implementa Kuadru Nasionál Polítika nian ba Edukasaun Pré-eskola nian no Planu Asaun Estratéjiku, no implementa projetu pilotu atu harii pré-eskola 12 iha comunidade rurál iha munisípiu Aileu no Ermera ne'ebé tama iha iniciativa Eskola Amigavel ba Labarik, no mós garante rekursu finanseiru sira suficiente ba dezentvolvimentu no haluan edukasaun infantíl;**

(b) **Aumenta asesu, kontinuasaun no konkluziun hosi edukasaun bázika liu hosi kualidade edukasaun inkluziva no diak liu, liliu ba Labarik sira ho defisiénsia, labarik sira ne'ebé moris iha kiak aat liu, isin-rua hosi inan foin-sa'e, labarik sira ne'ebé moris iha área sira rurál no labarik sira nu'udar membru iha grupu linguístiku ki'ik.**

(c) **Kontinua hadiak asesu no kualidade ba edukasaun ba labarik sira hotu, no garante kualidade treinamentu ba profesór sira, liliu iha área sira rurál;**

(d) **Kontinua dezentvolve livu testu bilinge no matadalan ba profesór kona-ba matéria sira hotu;**

(e) **Garante asesu, liliu ba labarik sira iha situasaun vulnerável, ba edukasaun maski laiha kapasidade atu selu kustu sira indiretu, inklui liu hosi bolsa estudu nian no programa aihán, no kontinua aumenta kapasidade atu rezolve fatin eskola ne'ebé la suficiente; no**

(f) **Aumenta polítika sira ba igualdade jéneru nian iha sektór edukasaun nian, ho garantia katak iha formasaun ba profesór sira hotu tama kestaun ba jéneru no sensibilidade ba formasaun nu'udar obrigatóriu iha nível sira hotu, no rezolve situasaun kona-ba violénsia, no asédiu seksual iha eskola sira.**

G. Medida sira kona-ba protesaun espesial (art. 22, 30, 32, 33, 35, 36, 37 (b)–(d), 38, 39 no 40 iha Konvensaun)

Esplorasaun ekonómika, inklui servisu infantíl

56. Komité haksolok ho Komisaun Nasionál kontra Servisu Infantíl ne'ebé harii iha 2014 no Inspesaun-Jerál Servisu nian iha 2010, no mós ho implementasaun hosi Programa atu Hapara Forma Aat liu hosi Servisu Infantíl. Maski nune'e, Komité preokupa ho labarik sira barak liu ne'ebé envolve iha servisu infantíl, liuliu iha agrikultura, inklui sektór kafé, peska, konstrusaun, servisu doméstiku, fa'an iha merkadu no iha dalan, no prostituisaun, hanesan mós situasaun hosi labarik sira ne'ebé uma-kain obriga atu servisu nu'udar atan hodí selu dívida boot.

57. Komité rekomena ba Estadu atu:

(a) **Implementa medida sira atu prevene labarik sira hosi explorasaun ekonómika liu hosi aprova lejislasaun no polítika sira kona-ba servisu infantíl iha sektór formál no la formál, au garante katak tuir artigu 32 iha Konvensaun, liliu hosi bandu buka no oferta labarik ba atividade la legál, inklui servisu todan, no mós bandu servisu perigozu;**

(b) Kontinua hasa'e konsiénsia kona-ba konsekuénsia aat hosi servisu infantíl liu hosi programa edukasaun ba públiku, inklui kampaña organizada ho kooperasaun ho líder sira, uma-ka'in sira no mídia nia opiniaun, hanesan iha komemorasaun ba Loron Mundiál Kontra Servisu Infantíl;

(c) Konsidera ratifikasaun ba Konvensaun N.º 138 ILO nian kona-ba Otas Mínimu ba Servisu (1973), no

(d) Buka asisténsia téknika hosi Programa Internasionál ba Hapara Servisu Infantíl ILO nian.

Labarik sira ne'ebé ho situasaun moris iha dalan sira

58. Komité haksolok ho informasaun kona-ba inisiativa sira hosi Estadu atu apoia labarik sira ne'ebé ho situasaun moris iha dalan sira. Maski nune'e, Komité preokupa ho informasaun no dadus la suficiente kona-ba situasaun labarik sira ho situasaun moris iha dalan sira no laiha polítika ruma ba asuntu ne'e.

59. Komité rekomenda ba Estadu atu:

(a) Halao estudu klean kona-ba kauza ne'ebé halo labarik sira iha situasaun moris iha dalan sira, hanesan kiak, violénsia familiár, no falta asesu ba edukasaun;

(b) Dezenvolve estratéjia diak ba protesaun labarik sira iha situasaun moris iha dalan sira ho objetivu atu prevene no hamenus situasaun ne'e; no

(c) Fó protesaun no asisténsia ba rekuperasaun no atu integra fali labarik sira ho situasaun moris iha dalan sira, inklui fatin toba, edukasaun no formasaun profesionál, servisu saúde diak, inklui teste HIV/AIDS, no servisu sosiál seluseluk, inklui programa ba konsumu substánsia/droga sira no apoiu ba saúde mentál.

Fa'an, tráfikku no na'ok ema

60. Komité haksolok ho Grupu Servisu Entre Ajénsia sira, no verifika katak projetu lei ba Prevensaun, Hamenus no Punisaun Tráfikku ho Ema, ne'ebé hanoín espesífiku ba vítima sira nu'udar labarik no testemuña sira, apresenta daudaun iha Parlamentu Nasionál. Maski nune'e, Komité preokupa tanba Estadu ne'e nu'udar fatin destinu ba fetu no labarik-fetu ne'ebé mai hosi tráfikku seksuál no mós rain ne'ebé ema boot no labarik sira barak tama iha servisu todan nu'udar atan. Komité mós preokupa ho falta informasaun kona-ba labarik sira hira mak tama iha esplorasau seksuál, inklui prostituisaun, pornografia infantíl no tráfikku umanu, no mós falta informasaun kona-ba formasaun hosi ofisiál ne'ebé servisu iha fronteira no aplikasaun ba lei atu prevene tráfikku;

61. Komité rekomenda ba Estadu atu:

(a) Aprova no implementa Lei ba Prevensaun, Hamenus no Punisaun Tráfikku ho Ema, no estabelese, aprova no implementa Planu Asaun Nasionál atu Kombate tráfikku Umanu, no mós haforsa inisiativa hasa'e kapasidade sira ho objetivu mak hadiak resposta hosi autoridade polísia nian iha kazu sira ba tráfikku umanu;

(b) Estabelese mekanismu monitorizasaun atu investiga no rezolve abuzu sira-ne'e, ho objetivu atu hadiak responsabilidade, transparénsia no atu prevene violasaun sira ba Konvensaun, no mós atu garante kastigu no punisaun efetiva ba sé mak halo esplorasau ho labarik sira ba prostituisaun ka iha servisu todan/atan nian.

(c) Kontinua implementa polítika no programa sira diak atu prevene, rekupera no ba integrasaun fali iha sosiedade hosi labarik sira nu'udar vítima, no garante katak sira iha edukasaun no formasaun, no mós apoiu psikolójiku, kuidadu

saúde no servisu sosiál seluseluk, tuir rezultadu dokumentu sira ne'ebé aprova iha Kongresu sira Mundiál kontra Esplorasaun Seksual Komersiál hosi Labarik sira; no

(d) Aumenta kampaña edukasaun públika no identifika vítima sira no atakante, medida sira ba prevensaun no dalan sira atu fó assisténsia no hadiak, inklui kódigu globál ba étika Organizaun Turizmu Mundiál (UNWTO) nian ba turizmu iha indústriá turizmu nian.

Administrasaun no justisa ba foin-sa'e sira

62. Komité verifika informasaun iha relatóriu Estadu ne'e kona-ba rejime justisa foin-sa'e nian iha daudaun revizaun no reforma ne'ebé diak. Maski nune'e, Komité preokupa ho:

(a) Falta informasaun kona-ba projetu-lei Tutelár no Edukasaun ba Labarik sira ho tinan 12 to'o 16, no projetu ba Rejime Penál Espesiál ba Labarik ho tinan 16 to'o 21 ne'ebé determina otas ba protesau justisa foin-sa'e ba tinan 16;

(b) Kapasidade no pesoál la suficiente ho formasaun espesializada iha administrasaun justisa ba labarik, inklui advogadu sira, juis sira, prokuradór sira no defensor sira públiku, no ofisiál korresaun nian;

(c) Falta dadus kona-ba assisténsia legál ba labarik sira ne'ebé iha konflitu ho lei, programa diversaun nian, no alternativa sira ba detensaun, hanesan servisu komunitáriu, no liberdade kondisionál;

(d) Laiha dadus kona-ba labarik sira hira mak hela iha estasaun polisia nian no iha prizaun preventiva no durasaun ba prizaun molok hasoru juis ka majistradu ida;

(e) Utilizasaun ba mekanizmu mediasaun informál atu rezolve kazu sériu loos kona-ba labarik sira ne'ebé iha konflitu ho lei; no

(f) Halibur hamutuk prizioneiru adultu ho foin-sa'e sira iha prizaun Bekora, no laiha sentru juventude ida iha rain tomak.

63. **Tuir komentáriu jerál N.º 10 (2007) kona-ba direitu ba labarik sira iha justisa ba foin-sa'e sira, Komité rekomenda maka'as Estadu atu halo ninia sistema justisa ba foin-sa'e sira tuir Konvensaun, no, espesiál liu, Komité rekomenda Estadu atu:**

(a) **Garante katak labarik sira hotu, tuir definisaun mak ema hotu to'o tinan 18, hetan protesau hosi sistema justisa fon-sa'e nian;**

(b) **Aprova metodolojia jerál no preventiva atu rezolve problema hosi labarik sira ne'ebé iha konflitu ho lei no faktór sosiál ho relasaun ho ida-ne'e, atu apoia labarik sira ne'ebé hetan risku iha faze sedu liu, no inklui aumentu ba programa intervensaun nian, formasaun profesionál no atividade divulgasaun seluseluk;**

(c) **Promove justisa diak liu no medida alternativa sira ba detensaun, tuir hanoin ba jéneru ho programa la hanesan ba mane sira no fetu sira ne'ebé iha konflitu ho lei, hanesan diversaun, liberdade kondisionál, mediasaun, fó-hanoin, ka servisu komunitáriu, bainhira bele, no garante katak tama de'it iha prizaun bainhira laiha opsaun seluk no durante tempu badak liu no katak iha revizaun beibeik ho objetivu atu hasai nian;**

(d) **Bainhira tenki duni tama iha prizaun, garante katak iha fatin diak ba labarik sira ne'ebé iha konflitu ho lei, katak labarik sira la hela hamutuk adultu sira, no katak kondisaun prizaun tuir lei internasionál sira, ne'ebé inklui asesu ba edukasaun no servisu saúde;**

(e) Garante servisu rehabilitasaun efektivu, ne'ebé inklui asesu ba apoiu saúde mentál no tratamentu ba abuzu substánsia/droga, no mós ba dezvoltimentu kompeténsia sosiál no edukasaun efativa, ne'ebé inklui programa formasaun profesionál;

(f) Hasa'e kompeténsia sira no especializasaun hosi atór sira hotu relevante iha sistema justisa foin-sa'e nian, inklui pesoál aplikasaun ba lei, advogadu sira, juis sira no servisu-na'in sosiál, no haforsa mós sistema judisiál, no mós materiál ba formasaun; no

(g) Utiliza ferramenta assisténsia téknika ne'ebé Grupu Entre Ajénsia ba Justisa Foin-sa'e no ninia membru sira dezvoltolve, inklui Eskritóriu Nasoins Unidas kontra Droga no Krime (UNODC), UNICEF, OHCHR no ONG sira, no husu assisténsia téknika iha área justisa ba foin-sa'e sira ba membru hosi Grupu ne'e.

H. Ratifikasaun ba Protokolu nu'udar Opsaun tuir prosesu komunikasaun

64. Komité rekomenda Estadu, atu haforsa tan direitu labarik sira-nian, atu ratifika Protokolu Opsaun ba Konvensaun Direitu Labarik nian tuir prosesu ho komunikasaun.

I. Ratifikasaun ba instrumentu internasionál direitu umanu nian

65. Komité rekomenda ba Estadu, atu haforsa tan direitu labarik sira-nian, atu ratifika Konvensaun Diretu ba Ema Defisiénsia no Konvensaun Internasionál ba Protesaun ba Ema Hotu ne'ebé Obriga Subar. Komité mós rekomenda ba Estadu atu ratifika Protokolu sira nu'udar Opsaun ba tratadu prinsipál sira direitu umanu nian ne'ebé iha Sekretáriu-Jerál ba Nasoins Unidas no iha ne'ebé seidak hola parte.

J. Kooperasaun ho instituisaun rejionál no internasionál

66. Komité rekomenda ba estadu atu koopera, entre instituisaun oioin, ho Komisaun ASEAN ba Promosaun no Protesaun hosi Diretu Feto no Labarik nian, no ho Komuidade Rain ho Lian Portugés (CPLP).

IV. Implementasaun no hato'o informasaun

A. Akompañamentu no divulgasaun

67. Komité rekomenda ba Estadu atu implementa medida sira diak atu garante katak rekomendasau sira hosi observaun ho konkluzau sira-ne'e hetan implementasaun kompleta. Komité mós rekomenda katak relatóriu daruak hamutuk datoluk nian, resposta liu hosi hakerek ba problema iha Estadu no observaun ho konkluzau sira-ne'e sei disponivel iha lian sira rain nian.

B. Relatóriu tuir mai

68. Komité konvida Estadu atu hatama ninia relatóriu periódiku dahaat nian to'o 15 Abril 2020 no atu inklui iha relatóriu ne'e informasaun kona-ba implementasaun hosi observaun ho konkluzau sira-ne'e. Relatóriu ne'e tenke tuir matadalan

espesífiku ba relatóriu hosi Komité ne'ebé aprova iha 31 Janeiru 2014 ((CRC/C/58/Rev.3) no la bele liu liafuan 21200 (haree rezolusaun Assembleia Jerál 68/268, para. 16). Karik hatama relatóriu ida ne'ebé número ba liafuan liu limite ne'e, Komité husu fali ba Estadu atu habadak relatóriu to'o kumpre rezolusaun ne'ebé hatete iha leten. Se karik Estadu la bele halo revizaun no hatama fali relatóriu foun, ami la bele garante tradusaun hodi instituisaun konsidera relatóriu ne'e.

69. Komité konvida mós Estadu atu hatama dokumentu baze atuál, ne'ebé la liu liafuan 42400, tuir rekizitu ba dokumentu baze komún iha akordu ba matadalan kona-ba relatóriu ba tratadu internasionál ba direitu umanu sira-nian, ne'ebé inklui orientasaun sira iha dokumentu ida komún no dokumentu espesífiku ba tratadu (HRI/GEN/2/Rev.6, kap. I) no rezolusaun Assembleia Jerál 68/268 (pará.16).
